

**Radunanza generala dal CAS EB, ils 15 avrigl 2008,
aint illa sala da gimnastica a Guarda**

Nossa presidenta Gianna Rauch Poo driva la radunanza generala a las 20.15 e po salüdar a 75 commembras e commembers chi han chattà la via per gnir a nossa radunanza generala. Davo divers salüds specials bivgnainta ella a Maria Morell, la presidenta dal cumün da Guarda chi da il bivgnaint official dal cumün e surpiglia a listess mumaint eir la prüma runda da bavrondas. Ün cordial grazcha fich al cumün da Guarda. Divers commembers s'han laschà s-chüsar o a bocca o in scrit. Sco dombravuschs funcziunan Chasper Planta ed Andrea Bonifazi.

Sco surpraisa quista saira sun rivats ils uffants dal OJ per dir grazcha fich a Chasper Alexander Felix chi da gio sia carica sco manader dal OJ davo 8 ons.

Tractandas:

1. Protocol da la radunanza extraordinaria dals 4 october 2007 a Susch

Il protocol da la radunanza extraordinaria dals 4 october 2007 a Susch - scrit da Jon Poo Werro - vain prelet ed approvà cun applaus.

2. Rapport da la presidenta

Gianna Rauch rapportescha sur da sia lavur sco presidenta dal CAS EB. La suprastanza ha fat diversas tschantadas e la presidenta es ida a sezzüdas our da la val per seguir la politica federala e chantunala dal CAS.

Ella infuormescha cha no vain üna nouva pagina d'internet chi vain mantgnüda da Nicolo Pitsch.

No vain stuvü restampar il prospect da las chamonnas chi va davent sco panins frais-chs.

Gianna ha tgnü differentas sezzüdas a regard las chamonnas da Tuoi e l'alp Sprella, saja quai cun la suprastanza ma eir cun differentas instanzas.

Quist inviern ha la suprastanza fat visita sül asyl ad Oswaldo Bernetta chi ha pudü festagiar seis 95-avel anniversari.

Gianna ingrazcha als guardia chamonnas da Tuoi, Lischana ed eir a tuots da la Linard, als schefs da chamonnas, a la gruppa da salvamaint, a la gruppa da chans, als manaders dals CAS e OJ cul coach, revisuors da quint ed als redactors da nossa gazetina e la pagina d'internet. Ün grazcha fich va a Marianna Sempert chi fa da quinder inavant la traducziun tudais-cha dal cudeschin per nossa nouva pagina d'internet.

Gianna ingrazcha als 788 commembers da nossa secziun per lur fiduzcha. Inplü ingrazcha ella a tuot la suprastanza per la lavur prestada a favur da nossa secziun.

Fich allegraivel esa cha daspö december 07 sun entrats raduond 25 nouv commembers da la Val Müstair.

I circulescha üna glista cun tuot ils nouventrats ed ils sortits, uschè cha Gianna desista da tils preleger. Gianna da ün cordial bainvgnü a tuot ils nouventrats. Duos commembers ans han bandunats per adüna, quai sun Jon Cajos e Johann Fanzun. La radunanza s'adozza in lur memoria.

Il rapport da la presidenta vain approvà cun applaus.

3. Rapports dals differents schefs

3.1 Schef da gitas

Christian Wittwer rapportescha cuort sur da las activitads dal 2007/08. Ot gitas da bellezza han pudü gnir manadas tras l'on passà cun ün total da 67 participants. Las gitas d'inviern, 6 gitas in tuot, han attrat 56 participants. Christian ingrazcha a tuot ils manaders chi sun stats pronts dad organisar üna o tschella gita.

3.2 Schef da salvamaint

Jöri Felix rapportescha sur dals divers salvamaints cha la gruppa da nossa secziun ha gnü. 13 jadas haja dat alarm e 3 jadas hana propi stuvü ir. El muossa purtrets impreschiunants sur da sia lavur. Pro tuot sia lavur ha'l partecipà a differents cuors da salvamaint our da las pendicularas, ün d'instà ed ün d'inviern.

3.3 Schef da chamonnas

Cla Duri Janett raportescha:

- La chamonna Tuoi resta serrada causa renovaziun ed ingrondimaint dals 12 mai fin e cun ils 4 lügl 08.
- Sülla chamonna Linard e Lischana nu sun previssas ingünas grondas lavuors. Sülla Lischana daja alchet pitchnas lavuors chi vegnan fattas da 6 giuvenils d'ürant ün eivna quista stà chi vain.
- Il plan dals guardia chamonna Linard es pront e parti aint. Quel as chatta pro Rico Luppi.
- Dal CC zentral daja ün nouv reglamaint da las chamonnas. Quel scumpartischa tanter oter sü nouv ils raps da la gestiun. Da quinder inavant dain no gio damain raps al CC central, causa cha tenor il nouv reglamaint stuvaina dar gio raps eir süllas bavrondas e las mangiativas. Quai vuol dir cha chamonnas cun blers giasts da di, pajan daplü sco fin qua.
- Quista stà chi vain sun previssas 4 fin d'eivnas per lavuors cumöna illa chamonna Tuoi. Las datas chattaivat aint in nos cudeschin. Scha qualchün ha interess per plaschair annunzchar pro Clà Duri.

3.4 Schef OJ

Quist on nu daja ingünas fotografias ed eir ingüna statistica da Chasper Alexander Felix. Per la paja prelega el our dal cudesch da gitas differentas impreschiuns ed episodas scrittas dals uffants dal OJ. El ingrazcha a tuot ils uffants per lur partecipaziun, ad Andri Poo sco chaschier e coach ed a Jachen Andri Planta sco manader dals traideschins. El s'allegra cha differents giuvens han fat ils cuors sco manaders ed es persvas da pudair surdar üna buna squadra a seis successur.

3.5 Respunsabel per l'ambient

Men Janett es respunsabel per l'ambient. Mincha secziun stu vess avair tenor il CC Svizzer ün respunsabel per l'ambient. Pro gronds progets sco l'ingrondimaint da l'implant da skis aint in Val Gronda vain el contactà. Pero eir scha zonas da quietezza per las bes-chas vegnan müdadas o ingrondidas sun üna part da sia lavur. Üna pitschna roba d'eira il monumaint artistic sül piz Madlain da Lavin. Dal CC central ha'l l'incumbensa cha nossa regiun sto gnir mantgnüda sco fin qua e brich gnir surfabrichada. Nicolo Pitsch manaja cha eir novas ovras d'electricità cun auals pitschens sco il Tasnan ed il Lavunoz stu vessan gnir survagliadas.

Ils differents rapports vegnan fats bun cun applaus.

4. Rendaquint 2007, rapport dals revisuors e dis-charg a la suprastanza

Il rendaquint e'l rapport dals revisuors sun publichats aint illa gazettina. Il quint da gestiun 2007 muossa ün vanz da CHF 705.--. La facultà netta als 31.12.2007 s'augmanta sün CHF 200'344.69. Eir quist on as haja pudü far amortisaziuns e la situaziun finanziaria da la secziun es fich buna.

Ils revisuors ingrazchan in lur rapport al chaschier per sia gronda lavur e propuonan acceptaziun dal quint 2007.

Il rendaquint 2007 vain acceptà cun unanimità da vuschs e la radunanza dà dis-charg a la suprastanza.

5. Contribuziun annuala

Per la contribuziun annuala dal 2008 propuona la suprastanza il seguaint sco fin qua:

| | |
|------------|---|
| frs. 28.-- | l'on per singuls commembers |
| frs. 56.-- | l'on per famiglias |
| frs. 15.-- | l'on per giuvenils in famiglias na commembers |

La radunanza generala fa bun quista proposta.

6. Tschernas pel bienni 2008 - 2010

Demischionà han Chasper Alexander Felix sco schef dal OJ e Josef Pattis sco revisur da quint.

Gianna ingrazcha per lur grond ingaschamaint ed impustüt eir a Chasper Alexander ch'el continua cun la lavur per la chamonna Tuoi fin cur cha tuot il fabricat es fini gio.

Sco nouv schef dal OJ vain proponü Tumasch à Porta e sco nouva revisura da quint Barbla Grass-Bonifazi. Ils ulteriurs da la suprastanza sun pronts da s'ingaschar eir da quinder inavant per nossa secziun.

Las propostas vegnan fattas bunas cun applaus.

7. Onurificaziuns dals veterans

Onurificaziuns vaina differentas per quist on:

25 ons commembers sun: Jürg Lippuner da Sent, Andri Linsel da Sent, Cristina Gregori Linsel da Sent ed Ursula Kindschi da Ftan.

40 ons commembers sun: Jachen Fratschöl da Davos e Rudolf Graf da Herrliberg.

50 ons commembers es: Rudolf Imboden da Sta. Maria.

60 ons commembers es: Valentin Hartmann da Scuol (El survain duos butiglias vin cun ün logo fat dad Andri Poo.)

La presidenta surdà a tuot ils veterans manzunats i'l rapport üna medaglia resp. ün diplom e tils ingrazcha per lur fidelità.

8. Orientaziun fabrica chamonna Tuoi

Illa radunanza extraordinaria da l'utuon 2007 a Susch esa gnü infuormà detagliadamaing dal proget e da l'ottezza dals cuosts previs. Chasper Alexander Felix infuormescha amo üna jada in üna survista che chi d'es previs da far. El explich a ils differents plans, il preventiv da cuosts, il plan da termins, la lavur cumöna previssa ect.

La finanziaziun vain declerada da nos chaschier Andri Linsel chi manzuna cha tras il fabricat nu vegnan generadas daplüzas pernottadas (no nu varan daplü lets sco fin qua) pero cha no vulain cun quist fabricat mantgnair quai chi'd es avant mans, amegliorar las vias da lavur e spordscher üna meglra infrastruttura a nos giasts ed eir al guardia chamonna.

Ils cuosts vegnan spartits sü seguaintamaing:

| | | |
|----------------|-----|------------|
| CC zentral | CHF | 75'000.-- |
| Sponsuors | CHF | 25'000.-- |
| Sportotto | CHF | 15'000.-- |
| Lavur cumöna | CHF | 25'000.-- |
| Agens mezs | CHF | 160'000.-- |
| Chapital ester | CHF | 320'000.-- |
| Total | CHF | 620'000.-- |

Tumasch Planta manaja cha la terrassa es exposta cun fich bler vent. Vaina üna soluziun? El manja cha la fatschada vers süd cun plattas dad Eternit es fich fraida.

Chasper declera cha la terrassa vain üna jada fabrichada e d'ürant ün on laina far las experiencias cul vent. E seguond quellas vulaina alura fabrichar ün paravent - scha bsögnaivel.

Ils mürs vers süd restan sco fin qua, pero il rinvestimaint da lain sto gnir refat. Quel vulaina far cun Eternit e cun collecturs.

La presidenta dumonda a la radunanza generala sch'ella es pronta da far bun il credit per la chamonna Tuoi sur CHF 620'000.--. La radunanza generala fa bun quist credit cun majorità da vuschs sainza üna cuntravusch.

9. Orientaziun proget Alp Sprella, Val Müstair

- In November 07 ha la radunanza da cumün da Müstair fat bun la proposta da surdar a nosssa secziun la chamonna Alp Sprella in dret da fabrica per 99 ons cun 101 schi cunter 42 na.
- No vain tut aint offertas per ün stüdi da princip pro la HTW a Cuaira e pro l'Academia Engiadina.
- No vain fingia survgni rebombs negativs dal uffizi da monumaints e da la Pro Natura Grischuna.
- La suprastanza dal CC zentral ha dat signals positivs dans vulair sustgnair cun noss'idea.
- Il AWT GR es eir orientà sur da la fatschenda e less esser infuormà co chi va inavant. Els sun pronts da discutir sur dad ün evt. sustegn finanziel.
- Ils prossems pass sun il seguaints:
 - Surdar la lavur per stüdi da princip fin la fin da mai
 - Elavuraziun da tal dūrant la stà
 - Inviern 08/09 concorrenza dad architects
 - Gün 09 dumonda da finanziaziun a la radunanza dals delegiats dal CAS Svizzer
 - Il plü bod cumanzamaint da la fabrica dal 2010.

10. Varia

- Gianna ingrazcha a Chasper Alexander ed a Mario Rauch per lur gronda lavur cun ün bon bon da regal ed a Josef Pattis cun üna butiglia vin.
- Regula Bücheler fa recloma per il di da geologia chi ha lö ils 23.08.08.
- Nicolo Pitsch preschainta la nouva pagina dad internet. Nouv es aint üna plattform - ün uschedit chatroom - per chattar cumpogns dad ir in gita.
- Ün grazcha fich va a l'ustera Marie Luise Maier da la pensiun Val Tuoi chi ha organisà l'ustaria.

La presidenta serra la radunanza a las 22.45 e da inavant il pled a Jon Andri Fliri chi muossa purtrets da bellezza da seis viadi in Nepal. A tuots giavüscha Gianna ün bun arriv a chasa.

Scuol, ils 24 avrigl 2008

Per il protocol:

Corsina Feuerstein Betschart
actuara

Gianna Rauch Poo
presidenta